

von Wulf Wager

## Gscheidle



Neulich ben i nach Berlin gfloga. Tegel nadierlich. Do hend se mi am TscheckIn in a Dreierroih' gsetzt mit ma vielleicht 12-jähriga Mädle ond ma obacha wichtig wirkenda Mänätscher. Noch ma Weile hot der des Mädle ag'schwätzt ond ihra vrzehlt, dass die Zeit beim Fliega viel schneller verganga dät, wemmr sich ondrhält. Ob se sich denn net mit ihm a bissle ondrhalta wöllt, hot'r se gfrogt.

"Ibr was?, hot des Mädle wissa wella.

"Zom Beispiel ibr Atomkraftwerk!", hot der Mänätscher no gsait.

"Guat", hot des Mädle gsait, "aber vorher han i no a Frog. A Schof, a Kuah ond an Gaul standat auf ra Wies. Alle drei fressat em Prinzip's Gleiche, nämlich Gras. Trotzdem scheidt a Schof Bebbala, a Kuah Flada ond an Gaul Rossbolla! Kennat Sie mir erklära, wieso?"

No hot dr Mänätscher a Weile nochdenkt, isch abr net drufkomma ond hot gsait "Leider noi!"

Dodruf des Mädle ganz keck "Ond Sia wellat sich mit mir über Atomkraftwerk ondrhalta?"

Ganz helenge han i en mi nei gschmunzelt ond han denkt "Mädle, aus Dir ka nomol ebbes werda."

Bis näggschd Woch'

Ihr

WulfWager